

# **Y Pwyllgor Iechyd, Gofal Cymdeithasol a Chwaraeon**

**Dyddiad y cyfarfod: 14 Gorffennaf 2016**

## **Papur 1**

### **Cyfrifoldebau'r pwyllgor a'i flaenraglen waith yn y tymor byr**

#### **Diben**

1. Mae'r papur hwn yn:
  - nodi prif gyfrifoldebau'r Pwyllgor Iechyd, Gofal Cymdeithasol a Chwaraeon ('y Pwyllgor') ar gyfer y Pumed Cynulliad, ac yn
  - gwahodd y Pwyllgor i gytuno ar ei flaenraglen waith yn y tymor byr.

#### **Sefydlu Pwyllgorau a'u Cylchoedd Gorchwyl**

2. Mae Rheol Sefydlog 16.1 yn ei gwneud yn ofynnol i'r Cynulliad sefydlu pwyllgorau a chanddynt bŵer yn eu cylch gwaith i:
  - (i) archwilio gwariant, gweinyddiaeth a meysydd polisi'r Llywodraeth a chyrrff cyhoeddus cysylltiedig;
  - (ii) archwilio deddfwriaeth;
  - (iii) ymgymryd â swyddogaethau eraill sydd wedi'u nodi yn y Rheolau Sefydlog; a
  - (iv) thrafod unrhyw fater sy'n effeithio ar Gymru.
3. Drwy wneud hyn, mae'n rhaid i'r Pwyllgor Busnes sicrhau bod pob un o feysydd cyfrifoldeb y Llywodraeth a'r cyrrff cyhoeddus cysylltiedig, ynghyd â phob mater sy'n ymwneud â chymhwysedd deddfwriaethol y Cynulliad a swyddogaethau Ysgrifenyddion Cabinet Cymru a'r Cwnsler Cyffredinol, yn destun craffu gan bwyllgor neu gan bwyllgorau.

4. Ar 28 Mehefin 2016, sefydlodd y Cynulliad chwe phwyllgor pwnc<sup>1</sup> i gyflawni'r swyddogaethau a ddisgrifir uchod, yn ogystal â phwyllgor polisi a deddfwriaeth wrth gefn. Mae chwe phwyllgor arall<sup>2</sup> wedi'u sefydlu hefyd i ymgymryd â'r swyddogaethau a bennir yn y Rheolau Sefydlog, gan gynnwys y Pwyllgor Cyllid a'r Pwyllgor Cyfrifon Cyhoeddus.

### **Rôl a chyfrifoldebau'r Pwyllgor**

5. Sefydlwyd y Pwyllgor Iechyd, Gofal Cymdeithasol a Chwaraeon gyda'r cylch gwaith o "archwilio deddfwriaeth a dwyn Llywodraeth Cymru i gyfrif drwy graffu ar ei gwariant, ei gweinyddiaeth a'i pholisïau, yn cynnwys y meysydd a ganlyn (ond heb fod yn gyfyngedig iddynt): iechyd corfforol, iechyd meddwl, iechyd y cyhoedd a llesiant pobl Cymru, gan gynnwys y system gofal cymdeithasol."

6. Mae rhestr fanylach o gynnwys cylch gwaith y pwyllgor wedi'i hatodi yn Atodiad 1. Mae rhagor o fanylion am rolau a chyfrifoldebau ehangach pwyllgorau'r Cynulliad wedi'u nodi yn adroddiad y Pwyllgor Busnes, '[Pwyllgorau yn y Pumed Cynulliad](#)', a osodwyd gerbron y Cynulliad ar 23 Mehefin 2016.

### **Rôl a chyfrifoldebau'r Cadeirydd**

7. Mae'r Llywydd wedi ysgrifennu at yr holl Gadeiryddion yn dilyn eu hethol yn amlinellu disgwyliadau'r Cynulliad mewn perthynas â'r

---

<sup>1</sup> Y Pwyllgor Plant, Pobl Ifanc ac Addysg; y Pwyllgor Newid Hinsawdd, Amgylchedd a Materion Gwledig; Pwyllgor Diwylliant, y Gymraeg a Chyfathrebu; Pwyllgor yr Economi, Seilwaith a Sgiliau; y Pwyllgor Cydraddoldeb, Llywodraeth Leol a Chymunedau; y Pwyllgor Iechyd, Gofal Cymdeithasol a Chwaraeon

<sup>2</sup> Y Pwyllgor Materion Cyfansoddiadol a Deddfwriaethol; y Pwyllgor Cyllid; y Pwyllgor Deisebau; y Pwyllgor Cyfrifon Cyhoeddus; y Pwyllgor Craffu ar Waith y Prif Weinidog; y Pwyllgor Safonau Ymddygiad

Cadeiryddion a'r Pwyllgorau, yn ogystal â'r cymorth sydd ar gael iddynt. Mae copi o'r llythyr hwnnw wedi'i atodi yn Atodiad 2.

### **Sut mae'r pwyllgor yn gweithredu**

8. Mae'r rheolau a nodir yn Rheol Sefydlog 17 yn llywodraethu'r modd y mae'r pwyllgorau'n gweithredu. Mae cyngor ar unrhyw agwedd ar Reol Sefydlog 17 ar gael gan y Clercod. Mae rhai o elfennau allweddol Rheol Sefydlog 17 wedi'u nodi isod:

- Datgan Buddiannau (Rheol Sefydlog 17.24A) – Cyn cymryd rhan mewn unrhyw drafodion pwyllgor, rhaid i Aelod ddatgan unrhyw fuddiant, boed yn ariannol neu fel arall, sydd gan yr Aelod, neu hyd y gŵyr yr Aelod, sydd gan aelod o'i deulu, neu y mae'r Aelod neu aelod o'i deulu yn disgwyl ei gael sy'n berthnasol i'r trafodion hynny, ac y gellid ystyried yn rhesymol gan eraill ei fod yn dylanwadu ar gyfraniad yr Aelod.
- Cworwm (Rheol Sefydlog 17.31) – Rhaid datgan nad oes cworwm i gyfarfod pwyllgor os bydd llai na thri Aelod neu lai na thraean o nifer aelodau'r pwyllgor, pa un bynnag yw'r mwyaf, yn bresennol. Rhaid datgan nad oes cworwm i gyfarfod pwyllgor os un grŵp gwleidyddol yn unig a gynrychiolir gan yr Aelodau sy'n bresennol ar ddechrau'r cyfarfod.
- Natur agored y pwyllgorau (Rheol Sefydlog 17.40) – Rhaid i bwyllgorau gyfarfod yn gyhoeddus, a rhaid caniatáu mynediad ar gyfer darlledu cyfarfodydd cyhoeddus yn unol â'r trefniadau y bydd y Comisiwn yn cytuno arnynt. Caiff cyfarfodydd pwyllgorau eu darlledu ar Senedd TV, ac mae trawsgrifiadau o gyfarfodydd pwyllgorau ar gael ar ffurf ddrafft o fewn tri i bum diwrnod gwaith. Cyhoeddir y fersiwn derfynol o fewn 10 diwrnod gwaith.

- Cyfarfod yn Breifat (Rheol Sefydlog 17.42) – Caiff pwyllgor benderfynu gwahardd y cyhoedd o gyfarfod ffurfiol neu unrhyw ran o gyfarfod ffurfiol ar gyfer diben penodol. Nid yw'r Rheolau Sefydlog hyn yn berthnasol i gyfarfodydd anffurfiol.
- Dirprwyon (Rheol Sefydlog 17.48) –Caniateir i aelod o bwyllgor sydd wedi rhoi hysbysiad ymlaen llaw i'r cadeirydd gael ei gynrychioli mewn cyfarfod, neu ran o gyfarfod, gan Aelod arall o'r un grŵp gwleidyddol sydd wedi'i enwi ymlaen llaw.

### **Cymorth i'r Pwyllgor.**

9. Bydd tîm integredig pwrpasol yn darparu cymorth i'r Pwyllgor ym mhob agwedd ar ei waith. Mae'r tîm integredig yn cynnwys staff y Comisiwn yn y meysydd a ganlyn:

- Tîm Clercio'r Pwyllgor
- Y Gwasanaeth Ymchwil
- Gwasanaethau Cyfreithiol
- Cyfathrebu (Allgymorth ac Ymgysylltu â Phobl Ifanc)
- Y Gwasanaeth Cyfieithu a Chofnodi

### **Blaenraglen waith y Pwyllgor**

10. Mae rhestr o ymholiadau y gallai'r Pwyllgor eu cynnal yn gynnar yn y Pumed Cynulliad wedi'i hatodi yn Atodiad 3. Mae'r rhestr hon yn seiliedig ar drafodaethau anffurfiol y Pwyllgor yr wythnos diwethaf. Bydd y Pwyllgor yn cael cyfle i drafod ei raglen waith yn y tymor hwy yn ystod tymor yr hydref.

11. Yn ogystal, efallai y bydd y Pwyllgor am ystyried neilltuo amser yn gynnar yn nhymor yr hydref i drafod materion cynllunio strategol a'r dulliau o weithio y mae'r Aelodau'n eu ffafrio.

## **Materion eraill**

12. Bydd angen cynnwys nifer o faterion penodol eraill ym mlaenraglen waith y Pwyllgor, gan gynnwys:

### Deddfwriaeth

13. Gwnaeth y Prif Weinidog ddatganiad yn y Cyfarfod Llawn ddydd Mawrth 28 Mehefin yn amlinellu Rhaglen Ddeddfwriaethol Llywodraeth Cymru ym mlwyddyn gyntaf y Pumed Cynulliad. Mae'r rhaglen yn cynnwys ymrwymiad i ail-gyflwyno Bil Iechyd y Cyhoedd, ond heb y cyfyngiadau ar ddefnyddio e-sigaréts mewn mannau cyhoeddus caeedig.

14. Nid yw datganiad y Prif Weinidog yn cynnwys amserlen benodol ar gyfer cyflwyno Biliau unigol. Yn amodol ar y ffaith y bydd y Pwyllgor Busnes yn cytuno i gyfeirio Biliau penodol i'r Pwyllgor, efallai y bydd angen bod yn hyblyg wrth gynllunio'r flaenraglen waith er mwyn sicrhau bod y Pwyllgor yn gallu ymateb i ofynion y broses o graffu ar ddeddfwriaeth.

### Craffu ar y Gyllideb

15. Bydd y gwaith o graffu ar gyllideb Llywodraeth Cymru yn parhau i fod yn rhan arferol o raglen waith y Pwyllgor. Unwaith y bydd yr amserlen ar gyfer y gyllideb sydd ar ddod wedi'i chytuno, bydd y tîm clercio yn trefnu sesiynau craffu gyda'r Ysgrifenyddion Cabinet perthnasol.

## **Cam i'w gymryd**

16. Gwahoddir aelodau'r Pwyllgor i wneud y canlynol:

- nodi rôl a chyfrifoldebau'r Pwyllgor (paragraffau 5 a 6);

- cytuno ar ei flaenraglen waith yn y tymor byr (paragraff 10 ac atodiad 3);
- cytuno mewn egwyddor i neilltuo amser yn gynnar yn nhymor yr hydref ar gyfer cynllunio strategol (paragraff 11); a
- nodi'r materion penodol eraill i'w cynnwys yn y flaenraglen waith (paragraffau 12-14).